


**TEZAU LITURGIC**  
**15 IUNIE**

**SLUJBA**  
**SF. CUVIOS**  
**ZOSIMA**  
**DE LA**  
**VLADIMIR**



**MOSCOVA, 2000**



## НА МАЛОЙ ВЕЧЕРНИ

На Господи возвах: поставим стихов 4 и поем  
стихиры, глас 8.

*Подобен: Мученицы Господни:*

Преподобен и честен / светильник  
Божественный и светоносный, / под спудом  
житейския толстоты никогдаже скрывается: / но  
на версе полагает его высоких чудес  
Человеколюбец. / Того молитвами, Христе, /  
даруй людям Твоим велию милость. **(Дважды)**  
На рало возложил еси, всечестне, / делание рук  
твоих, / делая всегда Божественная, / и не  
возвратился еси, зря вспять: / но был еси  
управлен в Царствие Христа Воплощагося  
Бога, / во спасение душ наших.  
В лодии телесней возимь, / кроткими дыхании  
кроткаго Духа, / легко прешел еси житейскую  
пучину, мудре: / и на бисере многоценнем твоя  
имения продав, / и обрет его / в себе удержал  
еси, блажен быв.

**Слава, глас 6:**

Преподобне отче, / во всю землю изыде вещание  
исправлений твоих: / темже на небесех обрел еси  
мзду трудов твоих, / демонская разорил еси  
полчища, / и ангельския достигл еси чины, /  
ихже житию непорочно поревновал еси. /  
Дерзновение имея ко Христу Богу, / мир испроси  
душам нашим.

На стиховне стихиры, глас 1.

*Подобен: Подобен: Небесных чинов:*

Наста, Богоносе, солнца светлейший твой  
праздник, / озаряет приходящая к тебе верою, /  
и бессмертием облагоухает, / и душам источает  
исцеления, / Зосимо, преподобне, / молитвенниче  
о душах наших.

**Стих:** Честна пред Господем / смерть  
преподобных Его.

Чувственные страсти телесныя / победив  
воздержания бродами, / чудодейственниче,  
Зосимо, / и ревности безплотных на земли  
показав, / вся плотская желания духу повинул  
еси: / тем ныне в Небесных селениях  
водворяясь, / моли о душах наших.

**Стих:** Блажен муж бояйся Господа / в заповедех  
Его восхощет зело.

Блажене Зосимо, / основание положив  
добродетели, / древняго человека совлекся еси с  
похотьми, / и во Христа облекся воистинну: /  
тем и обличил еси, преподобне, многая вражия  
ополчения, / наставник монахов быв, / моли  
спастися душам нашим.

**Слава, глас 2:**

Преподобне отче, / из младенства добродетели  
прилежно обучився, / орган был еси Святаго  
Духа, / и от Него прием чудес действо, / увещав  
еси человеки преобидети сладкая: / ныне же

божественным светом чистейше осияваем,/ просвети и наша мысли,/ Зосимо отче, наш.

## **НА ВЕЛИЦЕЙ ВЕЧЕРНИ**

На Господи возвах: поставим стихов 8 и поем стихиры, глас 1.

*Подобен: О дивное чудо:*

О дивное чудо!/ Служителю Жизни/ погребение уготовляется,/ и лествица к небеси гроб бывает:/ веселися пустошь Ульянова,/ богомудрого старца святой доме!/ Возопием верни,/ Зосиму имуще чиноначальника:/ Преподобне, радуйся,/ с тобою Господь,/ подай поющим ти/ богато велию милость. **(Дважды)**

О дивное чудо!/ Естество немощное/ в пустыню вселяется,/ и богоподобия благоухание источает:/ Ангели удивляются,/ разбегаются демонские полки,/ людие веселятся,/ такового имущее наставника:/ Преподобне, радуйся,/ с тобою Господь,/ подай поющим ти/ богато велию милость. **(Дважды)**

Дивны твоя дела, преподобне,/ Божие бо/ явился еси вселение,/ и горним гражданином нареклся еси днесь./ Житие твое многотрудное,/ Богоподобием запечатлено и чудесы./ Лики бо Ангельскими/ на небеса проводися./ Преподобне, радуйся,/ с тобою Господь,/ подай поющим ти/ богато велию милость. **(Дважды)**

Дивны твоя дела, богомудре, / ибо в тебе /  
Христос изобразися, / и верным добродетели  
образ бысть. / Подвигов твоих слава, / освещает  
мира концы. / Успением бо твоим, отче, /  
Пустынь прославися. / Преподобне, радуйся, / с  
тобою Господь, / подай поющим ти / богато  
велию милость. (Дважды)

**Слава, глас и подобен тойже:**

О дивное чудо! / Сергия житием / Зосима  
назидается, / и концы временные благочестие  
соединяет: / сердце твое, преподобне, / любовь  
претворися / в добродетелей святой доме, /  
Сергия богомудрого имущи наставника: /  
преподобне, радуйся, / с тобою Господь, / подай  
поющим ти / богато велию милость.

**И ныне, Богородичен:** Всемирную славу:  
Вход. Прокимен дне и чтения три.

**Премудрости Соломоновы чтение (главы 5 и 6):**

Праведницы во веки живут, и в Господе мзда  
их, и попечение их у Вышняго. Сего ради  
приимут Царствие благолепия и венец доброты  
от руки Господни, зане десницею покрывает я и  
мышцею защитит их. Приимет всеоружие  
рвение свое, и вооружит тварь в месть врагом.  
Облечется в броня правды и возложит шлем суд  
нелицемерен. Приимет щит непобедимый  
преподобие, поострит же напрасный гнев во

оружие, споборет же с ним мир на безумных. Пойдут праволучные стрелы молниины и, яко от благокругла лука облаков, на намерение полетят, и от камнеметных ярости исполнь падут грады. Вознегодует на них вода морская, реки же потопят я нагло. Сопротив станет им дух силы, и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навикните, судии концев земли. Внушите держащий множества, и гордящийся о народех язык, яко дана есть от Господа держава вам и сила от Вышняго.

### Премудрости Соломоновы чтение (глава 3):

Праведных души в руке Божией, и не прикоснется им мука. Непщевани быша во очесех безумных умрети, и вменися озлобление исход их, и еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком, и обладают людьми, и воцарится Господь в них во веки.

Надеющиеся Нань разумеют истину, и вернии в любви пребудут Ему, яко благодать и милость в преподобных Его и Посещение во избранных Его.

### Премудрости Соломони чтение (глава 4):

Праведник аще постигнет скончатися, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть. Восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же видевшие и не разумевше, ниже положше в помышлении таковое, яко благодать и милость в преподобных Его и посещение во избранных Его.

### На литии стихиры, глас 6.

Богоносе преблаженне, Зосимо, / все плотское мудрование духу повинул еси, / пощения страданьми утвердився, / яко злато в горниле искушено сияя явився, / приятелище был еси Духа Пресвятаго. / Собрав монашествующих

множества,/ и учении твоими,/ яко некоею  
лестницею восходною на небо,/ на высоту  
добродетели возвел еси./ Поминай нас чтущих  
память твою/ присно священную,/ и моли  
спастися душам нашим.

Возсия днесь пресветлая и всепразднственная  
память твоя,/ преславне Зосимо,/ созывающи  
многочисленное постник сословие,/ и  
преподобных ликостояния:/ ангелы же с  
человеки яко воистину к похвалению/ в Троице  
поклоняема Христа Бога нашего./ Темже  
притекающе к раце мощей твоих,/ исцелений  
дары обильно приемлем,/ и тебе венчавшаго  
Христа прославляем,/ Спаса душ наших.

Богоносе преблаженне, отче Зосимо,/ ты  
пророчески слезами землю омакал еси,/ и не дал  
еси сна твоима очима,/ ни веждама твоима  
дремания:/ сердечное желание ко Христу  
являя,/ Егоже возлюбил еси./ Тем монахов образ  
был еси,/ и всякия добродетели вид исправил  
еси:/ темже тя ублажаем/ величающе тебе  
прославльшаго.

**Слава, Глас 6:**

Богоблаженне,/ преподобне отче Зосимо,/ кто  
изочтет труды твоя и болезни,/ яже подъял еси в  
житии твоём,/ образ быв во спасение верным./  
Яко достиже высоты добродетелей:/ Христовы  
любви и смирения./ Сего ради и по

преставлении твоём, / явился еси лестницею  
небовосходною, / приводящую нас к  
Подвигоположнику: / Христу Богу нашему, /  
ему же молися, преподобне, о нас, / святую твою  
память почитающих.

**И ныне, Богородичен:** Кто Тебе не ублажит:

**На стиховне стихиры, глас 2.**

**Подобен: Дому Ефрафов:**

Дому Зосимов, / Пустынь святая, / веселием  
исполнися, / ибо в тебе / лик святых прославися.

**Стих:** Честна пред Господом / смерть  
преподобных Его.

Звездо пресветлая, / Зосимо пречудне, / настави  
нас грешных / в песнях воспети / житие твоё  
преславное.

**Стих:** Блажен муж, бояйся Господа, / в  
заповедех Его восхощет зело.

Пастырю добрый, / Христу подражателю, /  
огненной молитвою / паству твою огради / от  
злобы вражия.

**Слава, глас и подобен той же:**

Церковь святую, / уделе Владимирский, / собери  
ныне / в Пустынь Зосимову / праздником  
преподобного насладитися.

**И ныне, Богородичен:** О чуде новаго:  
Таже Ныне отпускаеши и Трисвятое.

**На благословении хлебов: тропарь  
преподобному, глас 4:**

Добродетелию препоясався, / стяжал еси дух  
мирен в житии твоём, / подражая доблественне  
подвигом преподобного аввы Сергия, /  
устроителя Троицкия обители. / Из неяже изшел  
еси в место пустынное, / и тамо победив  
демонские полки: / прославился яко истинный  
воин Христов. / Темже почитающее память  
твою, / с верою вопием ти: / спасай нас  
молитвами твоими, / Зосимо преподобне отче  
наш. **(Дважды)**

**И Богородице, Дево: единожды.**

### **НА УТРЕНИ**

**На Бог Господь:** тропарь святого, глас 4.

Добродетелию препоясався, / стяжал еси дух  
мирен в житии твоём, / подражая доблественне  
подвигом преподобного аввы Сергия, /  
устроителя Троицкия обители. / Из неяже изшел  
еси в место пустынное, / и тамо победив  
демонские полки: / прославился яко истинный  
воин Христов. / Темже почитающее память  
твою, / с верою вопием ти: / спасай нас  
молитвами твоими, / Зосимо преподобне отче  
наш. **Дважды.**

**Слава, и ныне,** Богородичен: Еже от века утаенное / и Ангелом несведомое таинство, / Тобою, Богородице, сущим на земли явися Бог, / в неслитном соединении воплощаем / и, крест волею нас ради восприим, / имже воскресив первозданного, / спасе от смерти души наша.

**По 1-й стихологии седален, глас 1.**

Яко луч светлый, явися житие твое на земли, преподобне, / просвещая и согревая вся приходящая к тебе. / Явился бо еси утешитель скорбящих, / врач искусный душ человеческих. / Житие твое чудно и успение со святыми, / отче святой Зосимо: / моли милостиваго Бога, / да не лишит и нас небесного чертога своего.

**Слава, и ныне, глас и подобен тойже:**

Мати пресвятая, Солнца мысленного, Христа Бога нашего, / очисти мя от скверн моих: / и растопи оледеневшее от грехов сердце мое, / да умиления плоды принесу Ти.

**По 2-й стихологии седален, глас 1.**

Яко благоуханный цвет явился еси, Зосимо преподобне, / в чистоте непорочной душу и тело соблюл еси, / теплою верою к Богу устремляясь / и сего ради возлюблен бысть от Него, / Иже и пресели тя в небесные обители, / идеже с лики ангельскими воспеваеши Святую Троицу. / Юже

моли о нас непрестанно, / да не лишены будем части спасаемых.

**Слава, и ныне, глас и подобен тойже:**

Пресвятая Дево, крине сладковонный непорочного девства: / скверна мя суца, очисти от всякого греха, / и жилищем Пресвятыя Троицы соделай, Владычице, / да во благодарении песнь хвалебную принесу Ти.

**Величание:**

Ублажаем тя, / преподобне отче наш Зосимо, / и чтим святую память твою, / наставниче монахов / и собеседниче Ангелов.

**Псалом избранный:** Терпя, потерпех Господа, и внят ми, / и услыша молитву мою.

**По полиелеи седален, глас 8.**

Подобен: Повеленное тайно.

Светом Божественным душу свою обуздав, / к Свету истинному преложился еси, Зосимо преподобне. / Сего ради в Света обителях живя /и Света Божественного наслаждаяся, / не забуди и нас, отче, молящихся тебе / и память твою светло празднующих.

**Слава, и ныне, глас и подобен тойже:**

Невечернего Света Всесветлая Мати, / Светом Сына Твоего просвети окаянную душу мою: / и в светлые одежды одея мя, / светлого брака Сына Твоего насладитися сподоби.

Таже степенна, 1-й антифон 4-го гласа. **Прокимен, глас 4:** Честна пред Господе смерть преподобных Его. **Стих:** Что воздам Господеви о всех,/ яже воздаде ми. Всякое дыхание:

Евангелие от Матфея, зачало 43.

**По 50-м псалме** стихира Глас 8.

Егда погребение претрудного твоего тела готовляшеся,/ тогда ученицы, обступивше одр/ со страхом зряху тя:/ и вси взирающие на тело/ скорбью одержими бяху,/ братия же со слезами зываше ти:/ о, старче,/ видим тя ныне, печальника всех,/ взятого гробом, и удивляемся,/ в тебе бо узресе будущия жизни нетление./ Но о преподобне,/ молися прилежно Христу и Богу нашему,/ спастися стаду твоему невредиму.

**Канонов два: Похвалы Богородицы на 6 и преподобному на 8.**

**Канон преподобного Зосимы, глас 8. Его же краегранесие:** Венец похвал сплетем Зосиме в песнех, братие.

### **Песнь 1**

**Ирмос:** Воду прошед, яко сушу,/ и египетского зла избежав,/ израильтянин вопияше:/ избавителю и Богу нашему поим.

Воспети песнь потщимся, братие, дивному

Зосиме: в скорбех скорому помощнику и в молитвах непреложному ходатаю нашему. Египет мира, оставив и Божию Десницею спасеся, избрал еси место пустынное: в нем же до конца вселився, ангела себе смирением сотвори.

Непроходимое пустыни обуздав и полчища бесовския рассеяв, новым Моисеем пастве своей соделался еси.

**Богородичен:** Ему же светила еси светом спасительным, Зосиме преподобному, Пресвятая, Пречистая: и нам, Облаком светлым и Столпом огненным буди, Одигитрия Владычице.

### Песнь 3

**Ирмос:** Небесного круга верхотверче, Господи, / и Церкви Зиждителю, / Ты мене утверди в любви Твоей, / желаний краю, верных утверждение, / Едине Человеколюбче.

Царство Света в душе насадив, преподобне, наставник изряден монахом явился еси, их же стада собрав, Богу привел еси, Зосимо богоблаженне.

Пустыни дикость приручив, Зосимо богомудре, помощницею ю для жаждущих спасения содела. Огнем молитвы, сердце преисполнив, отче, греешь паству свою от мраза греховнаго.

**Богородичен:** Хвалу принесем Наставнице нашей, рождшей всех Творца и Бога, и со умилением воззовем: духовное бесплодие наше преложи во благоплодие, Дево Нетленная, и плод духовный сотворити сподоби.

**Седален.** Глас 4. Подобен «Удивися Иосиф». Возсияв огнем Божественным, Зосимо преподобне, и на свещницу служения взойдя, душ поискал еси потерянные драхмы, отче: их же и обрет, Богу возложил еси.

**Слава и ныне:** Глас и подобен тойже. Аир присутствием Твоим освятися, Пустынь предстательством Твоим устройся, Пречистая Владычице: молися ко Господу, Всесветлая Одигитрие, о спасении душ наших.

#### Песнь 4

**Ирмос:** Услышах, Господи, / смотрения Твоего таинство, / разумех дела Твоя / и прославих Твое Божество.

Леность душевных очес отряс, преподобне, и Христа узрев впусти, сердечные отверзше двери: с Ним же и вечерял еси пророчески, отче. Совета даром воскипев, паству тучною содела, преподобне: Евангельскими словесы питая и умиления вином поя.

Подвиги твоими пустошь прославися, мощьми твоими земля угобзися, воздух же освятися

восхождением твоим, Зосимо терпеливодушне.  
**Богородичен:** Легкий облаче, Солнца  
мысленного, зной страстей прохлаждающий,  
буди нам Владычице: и свеще, путеводящая в  
нощи неведения.

### Песнь 5

**Ирмос:** Просвети нас повелении Твоими,  
Господи,/ и мышцею Твоею высокою/ Твой мир  
подаждь нам, Человеколюбче.

Егда совершенного жития восхотел еси, отче  
Зосимо преподобне, тогда в пустыню вселился  
еси, апостольски вопрошая: Христе, где  
живеши;

Тела немощное оставив, отче, деланием  
непрелестным к сиянию Востока умного  
устремился еси.

Евангельски шествие творя, Христа доброту  
неизреченную зрети возлюбил еси, ея же ныне  
наслаждаяся, поминай и нас, отче преподобне.

**Богородичен:** Мглу неведения нашего просвети,  
Дево, наставляя на путь спасительный. Вся бо  
возможно Тебе Путеводительнице Пречистая.

### Песнь 6

**Ирмос:** Молитву пролию ко Господу /и тому  
возвещу печали моя,/ яко зол душа моя  
исполнися/ и живот мой аду приближися,/ и  
молюся, яко Иона:/ от тли, Боже, возведи мя.

Змия лукавого силою Христовою уморив,  
преподобне, ходатай истинный показался еси  
всем с верою притекающим к тебе.

Окопав тщанием землю души своея, отче, и  
семены добродетелей насея, ученики своя Богу  
сторичествовал еси.

Сердечные глубины крепостию духа обновив,  
истинный служитель Христов явился еси, отче:  
Иону немощи своей служителя имея.

**Богородичен:** Изми из темницы греховной душу  
мою, Пречистая, и Сыну Своему принеси, ведя  
добродетелей путями.

### Кондак Гл. 8

Молвы житейской победителю преславный,/   
безмолвия рачителю, Зосимо преподобне:/ со  
умилением взирая на святое житие твое,/ к раце  
мощей твоих притекаем, яко благоухающему  
вертограду./ Ты же, яко имея дерзновение ко  
Господу,/ молися прилежно о нас, память твою  
чтущих и с любовию взывающих:/ Радуйся,  
преподобне отче Зосимо,/ пустынножителю и  
чудотворче предивный.

### Икос

Егда Ангелов Творец и всех человек  
Промыслитель/ избра ты от мира, преподобне  
отче,/ то в подвизех монашеских ты возрасти,/

да послужиши людем Его в нуждах духовных. /  
Мы же, восхваляюще святое твое житие, / со  
умилением благодарственно вопием ти: /  
Радуйся, от рождения Богом избранный: /  
радуйся, в пустынножителех славный. / Радуйся  
Ангелов житием своим удививый: / радуйся,  
смирения бездну явивый. / Радуйся, блага мира  
сего презревший: / радуйся, в сердце Бога  
воспевый. / Радуйся, цвете, Богом избранный: /  
радуйся, крине благоуханный. / Радуйся, яко  
всякую скорбь изгоняеши: / радуйся, яко  
радость в душах насаждаеши. / Радуйся,  
преподобне отче Зосимо, / пустынножителю и  
чудотворче предивный.

### Песнь 7

**Ирмос:** Божия снизхождения / огонь устыдися в  
Вавилоне иногда. / Сего ради отроцы в печи,  
радованною ногою, / яко во цветнице, ликующе,  
пояху: / благословен еси, Боже отец наших.

Велегордого посрамил еси, отче Зосимо,  
помощником себе Христа стяжав, и  
пустынничества подвиги мужественно проходя  
взывал еси, поя: отец наших Боже, благословен  
еси.

Плена страстей избавився, преподобне, и Света  
умного достиже, взывал еси, поя: отец наших  
Боже, благословен еси.

Евино неверие презрев, новому Адаму

подражати возлюбил еси, поя: Боже отец наших, благословен еси.

**Богородичен:** Сердце мое очисти и ум просвети, Одигитрия Владычице: развращенные пути предстательством Твоим исправи и Сыну Твоему разумно пети научи: отец наших Боже, благословен еси.

### Песнь 8

**Ирмос:** Царя Небесного, / Егоже поют вои Ангельстии, / хвалите и превозносите во вся веки.

Наследниче Христов показался еси, преподобне, Христу подражая, и сыном благодати Того явився, ангельския трапезы наслаждаешься. Елеем радости, Зосимо богоблаженне, помаза тя Христос Бог и во одежды добродетелей одея. Храм Пресвятыя Троицы соделав себе, преподобне, в дому своем собор святых возрасти.

**Богородичен:** Буди нам луною светлою, в нощи неведения, Пречистая Владычице, к рассвету Истины путеводящею.

### Песнь 9

**Ирмос:** Благословен Господь, Бог Израилев, / воздвигнувший рог спасения нам в дому Давидове, отрока Своего, / в нихже посети нас Восток с высоты / и направил ны есть на путь

мира.

Рака мощей твоих, отче, ароматы благоухает, целения точит, немощи умалает, скорби разоряет: мы же радуящиеся, песнь благодарения тебе приносим.

Ангелы возрадовашася, славне, демоны возрыдаша, святе, видя тя в селения райская вселяема.

Тело твое, в жизни дольней немощию обложимо бывше, в горней славно соделася, преподобне, благоухает бо чудесы и точит исцеления.

Искренний друже Христов, Зосимо богомудре, ангелов сожителю дивный и сонма святых начальниче, скорым помощником в скорбех буди нам и молитвенником непрестанным о спасении душ наших.

**Богородичен:** Его же на объятиях Твоих носила еси, Дево Одигитрие, Того моли с Зосимою преподобным и всеми святыми помиловати и спасти души наша.

**Светилен.**

Подобен: Апостоли от конец Лику своих ученик, отче, / ты завещающе рек, / без почестей погребите тело мое: / но Ты, Христе Спасе мой, / прими дух мой.

**Слава, и ныне,** подобен тойже Светом Сына Твоего / озари, Владычице, /

плачевную мира сего юдоль,/ в ней же шествие  
творя,/ Тобою наставляемся.

**На хвалитех поставим стихов 4, глас 8.**

**Подобен: О преславногo чудесе:**

О преславногo чудесе!/ Пустынь Зосимова,/   
отца преблаженногo / память радостно  
празднует днесь./ Монахов ликовствующих  
собрание,/ теплое моление приносит:/  
преподобне отче Зосимо,/ моли милостивогo  
Бога/ о спасении душ наших. **(Дважды)**

О преславногo чудесе!/ Житие смиренное/ аввы  
богомудрогo,/ образом добродетели показуется./  
Ангельские лики удивляются,/ верных  
множество восклицает:/ подобне отче  
Зосимо,/ наставником крепким явися нам / и  
молитвенником о душах наших.

О преславногo чудесе!/ Рака святых мощей,/   
старца предивногo,/ реки чудес изливает  
днесь./ Демонов смрад исчезает,/ благоуханием  
райским сердца исполняются,/ мирские концы  
благодарно взывают:/ отче подобне Зосимо,/   
молися непрестанно о спасении душ наших.

**Слава, глас 8:**

Монахов множества,/ наставника тя почитаем,  
отче наш Зосимо,/ твоею бо стезею воистину  
право ходити познахом:/ блажен еси Христу  
работав/ и вражию обличил еси силу,/ Ангелов  
собеседниче, подобных сопричастниче и

праведных, / с нимиже молися Господеви, /  
помиловатися душам нашим.

**И ныне, глас тойже:**

Владычице, прими молитвы раб Твоих, / и  
избави нас, / от всякия нужды и печали.

**Славословие великое. Тропарь святаго. Таже  
ектении. И отпуст.**

